



Siverth K. Heilmann
Atassut

UKA 2021/82
9. november 2021

Kinguaassiutitigut peqquserlunnikkut sakkortunerusumik ineqaatissinneqarsinnaalernissaat pillugu Naalakkersuisut Naalagaaffimmi oqartussaasunut saaffiginnissuteqarnissaat pillugu Inatsisartut aalajangiiffigisassaattut siunnersuut.
(Atassutip Inatsisartuni ilaasortaatitai)

Kinguaassiutitigut pinerluuteqartarnek pillugu Atassummiit siunnersuutitsinnut imatut naatsumik oqaaseqassaagut.

Ilumoorpoq ukiorparujussuarni, kinguaassiutitigut peqquserluttoqartarnera pissutigalugu, inatsisitigut sukaterisoqartariaqarnera pillugu, maani inimi eqqartorneqartartoq. Ajoraluartumimmi ilumoorpoq, nunatsinni kinguaassiutitigut atonerluisarnerit suli amerlasoorujussuunnaratik ajornartorsiutaaneri aammalu pinerluuteqarnikut, aqqusinikkut takussaasarnerat innarligaasunut toqqissisimanangilluinnarmat.

Pinaveersaartitsilluni suliniuteqartarnek aningaasaliisarnerillu annikillisinneqarnek ajoraluartut taamaattoq tunngavilersuutigisatsituut kinguaassiutitigut peqquserluttarnerit akiorniarlugit appartinniarutsigillu, iliuuserineqarsinnaasut una periarfissat ilagiinnarpaat, taamaattumillu suliaq iluatsissappat partiinit taparserneqarnissarput pisariaqartipparput.

Naalakkersuisut akissuteqarnerminni kinguaassiutitigut kanngutsaatsuliornerni pineqaatissiiinertigullu sukateriniartut aammalu suliniuteqareersimanerminnik kiisalu allannguutissatut siunnersuuteqarnerat Atassummiit maluginiarparput.

Taamatut naatsumik oqaaseqarluta, Atassummiit inassutigissavarput, suliap aappassaaneerreqartigani ataatsimiititaliamut susassaartumut ingerlateqqaarneqassasoq, taamaalilluni siunnersuutitta Naalakkersuisullu allannguutissatut siunnersuutaat nalilersorneqarsinnaaqqullugu.

Qujanaq.